

Brev a mes commembers en vischnaunca (7)

Mes cars amitgs

Suenter haver palesau en mes davos priedis zacontas historias ord miu cudisch da peleginadi hai retschiert pliras supplicas da translatar quel en tudestg e romontsch. Cunquei che quei savess cuzzar plirs onns ord motiv da temps sun sedecidius da far paleis a Vos quellas experienzas en mias columnas ella Tuatschina. Sepreparei pia da far cun mei quei viadi a Santiago ils proxims onns. La translaziun ei forsa buca exacta cunquei che biars da Vos enconuschan meglier quei peleginadi che mes lecturs ell'India.

La via da s.Giachen meina era tras Tujetsch aschia ch'enqual persuna pelegina vegn era en nossa baselgia per schar bullar siu pass da peleginadi. Els anflan quei sigil en ina scatla da maneivel dalla statua da Nossadunna nua che nus envidein las candeilas. Nies archivar Tarcisi Hendry ha tarmess a mi entginas informaziuns sur dalla tradiziun da nos babuns ch'ei peleginai da Tujetsch a Santiago. Nus havein era cheu la fraternitad da s.Giachen. Ulteriuramein ei nossa baselgia a Rueras dedicata a s.Giachen, agl apiestel da Santiago. Jeu hai giu pial gaglina enderschend dil grond diember da persunas ch'han frequentau quei viadi ils davos tschenteners. Nus essan ils artavels da pliras noblas tradiziuns ch'ei svanidas el decuors dalla historia. Pertgei savein nus buca schar reviver zacontas da quellas el futur?

Jeu hai patergau da viandar mia 3. etappa il settember cun miu amitg talian. La via franzosa da s.Giachen da Saint-Jean-Pied-de-Port, Frontscha tochen Santiago igl onn 2014 (790 km) e la via da s.Giachen el nord dad Irun tochen Santiago (820 km) essan nus gia viagiati. Quella ga levan nus passar la via portughesa da s.Giachen (610 km) da Lissabon naven. Deplorablamein ha il virus da corona midau nos plans. Era il plan da visitar mia patria ell'India hai stuiu strihar duas ga. Jeu fetsch uss ils plans da viandar la part en Svizzeria, la Via Francigena. La Via Francigena («La via che vegn ord la Frontscha») ei vegnida renomada cura ch'igl arzustg Sigeric igl emprem da Canterbury ei viandaus alla fin dil 10avel tschentener dall'Engheltiara a Ruma per saver retscheiver siu pallium dil papa. Ei setracta cheu dil peleginadi naven dalla fossa da s.Tumaisch tochen la fossa da s.Pieder e s.Paul. Il peleginadi meina atras plirs loghens cun fossas da sogns, denter auter era la fossa da s.Augustin da Padua ell'Italia.

Jeu planiseschel da far ina part dalla via da s.Giachen en Svizra da Sainte-Croix tochen il grond sogn Bernard che cuoza 10 dis. Sche zatgi less interpreter quell'aventura cun mei eis el cordialmein beinvegnius. Quei ei carteivel buc aschi bienmarcau sco da viandar en Spagna ord motivs ch'ei dat buca indrezs normals persuenter. Entgins loghens da quei viadi ein Pontarlier-St-Croix, Orbe, Cossonay, Losanna, Vevey, Aigle, St.Maurice, Martigny, Orsières, Bourg-Saint-Pierre ed il Pass dil grond sogn Bernard. Sche vos enconuscheis amitgs ni familiars che savessen dar albiert ad in «pauper pelegin» sin siu viadi fuss jeu fetg engrazievels da saver star tier els. In peleginadi ei per mei in viadi spiritual e buca in'aventura corporala. Jeu prendel cun mei ina pintga «valischa ds s.messa» e vegn a celebrar la s.messa mintga di. Cumbinau cun outras oraziuns urel pliras ga il s.rusari. Quella ga sun sedecidius da rugar per ils giavischs dil pievel tuatschin. Jeu less che nossa vischnaunca enderschess in niev resvegl che nossa giuventetgna ed affons suandassen la via da nos babuns e da nossas mummas.

La jamna vargada havein nus festivau nies patrun baselgia senza processiu en in'otra fuorma. Igl ei dentons stau bi cul cant dil schor e la decoraziun en baselgia. Nossa baselgia ha purtau aschi bia glisch ils davos tschenteners en nossas famiglias. Quels ch'ei stai a messa han engraziu a Diu ed ein seregurdai da lur geniturs che han stuiu sufferer bia mo era saviu guder legria enten fundar cheu ina communitad da baselgia. Ils biars dad els ein vegni battegiati, ein maridai ed ein vegni satrai en quei liug. Entgins dad els han forsa en temps da legria en lur veta spons enqual larma en quella baselgia. Nossa beinstonza materiala ei era il resultat da lur veta spirituala. Igl ei temps dad empermetter ad els da cuntinuar cun quei ch'els han entschiet. Lein empruar da mantener quella flomma dalla veta e da dar vinavon ella a nos affons e biadis.

Sur Mathew Charthakuzhiyil